

Segulai dan Sejalai :

WARGA AKADEMIK DARI PENGAJIAN SAINS KOMPUTER, SAINS MAKLUMAT DAN SAINS MATEMATIK MENGHADIRI PERJUMPAAN BERSAMA PENOLONG NAIB CANSOLOR, KOLEJ PENGAJIAN PENGKOMPUTERAN, INFORMATIK DAN MATEMATIK (KPPIM)

Penulis: Sharin Sulaiman



Penulis: Sharin Sulaiman

1 Ogos 2023 (Selasa) merupakan detik bersejarah apabila buat pertama kalinya semua pensyarah dari ketiga – tiga bidang yang berbeza iaitu Sains Komputer, Sains Maklumat dan Sains Matematik duduk bersama di dalam satu perjumpaan bagi meraikan lawatan daripada Yang Berbahagia Profesor Dr Haryani binti Haron, Kolej Pengajian Pengkomputeran, Informatik dan Matematik UiTM Selangor Shah Alam. Yang berbahagia Prof Dr Haryani ditemani oleh bak kata dirinya sendiri 3 hulubalang iaitu Ketua Pusat Pengajian yang mewakili tiga bidang utama iaitu Sains Komputer iaitu Dr Mohamad Yusof Bin Darus, Sains Maklumat, Dr Hussain Bin bin Hashim dan Sains Matematik, Prof Madya Dr Ahmad Zia Ul-Saufie Bin Mohamad Japeri.

Perjumpaan yang dijaualkan bermula pada pukul 2.00 petang dimulakan agak lewat kerana masing – masing menunggu ketibaan rombongan yang diketuai oleh Prof Dr Haryani. Seperti kebiasaannya, sementara menunggu, para pensyarah yang hadir mula berbual sesama sendiri dan ada juga yang sibuk menyemak kerja kursus pelajar masing – masing. Ketibaan rombongan datang tepat pukul 2.30 petang dan

semua pensyarah lantas berdiri menunjukkan rasa hormat kepada tetamu jempunan dan pengacara majlis iaitu Encik Abdul Hadi mula beraksi. Seperti biasa pada mana-mana majlis rasmi, lagu keramat UiTM Di Hatiku berkumandang di dalam Auditorium Fakulti Sains Gunaan, Blok G, UiTM Cawangan Sarawak Kampus Samarahan 2.

Setelah habis nyanyian lagu UiTM Di Hatiku, semua pensyarah dikehendaki untuk duduk dan pengacara majlis meneruskan acara dengan menjemput Encik Norizuandi untuk memimpin bacaan doa dan kemudian mempersilakan Dr Lee

Been Yong, Ketua Pusat Pengajian Sains Komputer dan Pelancongan yang turut mengalas amanah sebagai wakil Rektor UiTM Cawangan Sarawak, Prof Dr Haji Jamil Bin Haji Hamali untuk menyampaikan kata aluan kepada tetamu yang hadir. Majlis kemudian diteruskan dengan pengacara majlis menjemput Prof Dr Haryani untuk menyampaikan ucapan beliau. Sekilas pandang jika dilihat macam Prof Dr Haryani ini semacam seorang ibu yang tegas, namun sebenarnya beliau seorang yang mudah didekati dan mesra. Ucapan beliau dimulakan dengan beliau mengatakan sebenarnya beliau mengambil keputusan saat akhir dengan tidak menyertai rombongan rasmi ke kampus Mukah tetapi memilih untuk bersama-sama warga KPPIM di UiTM Sarawak, Kampus Samarahan. Katanya lagi, perjumpaan ini meski tidak lama namun amat bermakna untuk beliau berjumpa dengan keluarga KPPIM di Sarawak. Antara intipati ucapan yang lain ialah penerangan dengan idea penggabungan kolej, semangat kekeluargaan antara ketiga tiga bidang pengajian, hasil perjumpaan beliau dengan Kementerian Utiliti, Tenaga dan Komunikasi Sarawak dan persediaan mindset warga KPPIM dengan hasil penggabungan tiga bidang pengajian dan relevannya dengan keperluan semasa.

Selain itu, dalam ucapannya, beliau merasa yakin bahawa KPPIM, UiTM Cawangan Sarawak mampu menjadi sebuah kolej pengajian yang menjadi pemangkin penting untuk mempersiapkan siagakan Sarawak sebagai sebuah negeri berasaskan ekonomi digital dan untuk merealisasikan hasrat perlu lebih melihat kesan positif penyatuan ketiga-

tiga fakulti ini di masa hadapan. Setelah selesai berucap, beliau kembali semula ke tempat duduk dan setelah itu pengacara majlis kemudiannya menjemput Encik Satria Arjuna untuk memulakan sesi dialog bersama tetamu jempunan. En Satria terus membaca soalan daripada aplikasi Slido dimana aplikasi ini memudahkan proses sesi soal jawab.

Antara soalan yang diutarakan adalah bagaimana penggabungan ini dapat memberi manfaat kepada warga KPPIM dan ada juga pensyarah mencadangkan KPPIM pusat mengadakan satu perjumpaan dalam talian 2 atau 3 kali setahun melalui aplikasi seperti Webex dan youtube bersama seluruh warga KPPIM di seluruh Malaysia. Selain itu ketika soal jawab ini, ketua pusat pengajian Sains Komputer, Sains Maklumat dan Sains Matematik mengambil kesempatan memperkenalkan diri sendiri dan turut sama membalas setiap soalan yang diutarakan. Pendek kata, rata – rata warga akademik KPPIM, UiTM Cawangan Sarawak yang hadir menyambut baik idea penyatuan ketiga – tiga bidang pengajian ini dan berjanji agar Kolej Pengajian Pengkomputeran, Informatik dan Matematik ini mampu menjadi pemangkin kepada UiTM secara keseluruhannya ke aras Globally Renowned University (GRU) menjelang tahun 2025.



Pensyarah dan Ketua Pusat Pengajian Sains Maklumat UiTM Sarawak bersama Ketua Pusat Pengajian Sains Maklumat KPPIM, Dr Hussain Bin Hashim.